

Kevin Brunold per Stefan Engler

Midadas al timun da la PCD dal Grischun

DA MARTIN CABALZAR/FMR

■ **La delegada da la PCD dal Grischun – che ha già lieu en la sala dal Marsöl a Cuira – ha tschernì il deputà sursilvan Kevin Brunold sco successur da cusseglier dals chantuns Stefan Engler sco nov parsura. Nova vicepresidente en piazza da Silvia Casutt-Derungs diventa Yvonne Brigger-Vogel.** En il directori vegnan plinavant reeligids: il segund vicepresidente *Alessandro Della Vedova*, il cassier *Livio Zanetti*, il pledader da medias *Reto Cramer* e l'assessura *Nicolina Laim*.

Ex officio appartegnan al directori plinavant ils cussegliers governativs *Marcus Caduff* e *Mario Cavigelli*, il cusseglier naziunal *Martin Candinas*, il cusseglier dals chantuns *Stefan Engler* e l'actual schef da fracziun, *Remo Cavegn*, ch'è vegnì tschernì dacurt dal parlament grischun sco nov president dal Tribunal chantunal e sto uss vegnir remplazzà. Confermads vegnan er ils revisurs *René Epp* e *Patric Vincenz*.

En pietad sa regordan ils preschents a la delegada dals commembers trapassads: ant. cusseglier governativ *Bernardo Lardi*, ils ant. deputads *Heinrich Berther* e *Walther Sachet* e l'anteriu suppleant *Alfred Rieder*.

Il nov parsura Kevin Brunold

Kevin Brunold (35) è naschì e creschì si a Surcuolm nua ch'el abitescha oz puspè cun sia famiglia. L'econom da manaschi è engaschà professunalmain sco gestiuari da Surselva Turissem. El è plinavant stà involvì en projects da fusiun da vischnancas, participà dapi blers onns a manaschis d'hotel e gastronomia ed engaschà en diversas uniuns ed organisaziuns.

Entaifer la partida ha Brunold già occupà differentas scharschas, dapi 2018 è el deputà da la Foppa ed actualmain er president da la PCD regiunala da la Surselva. (Intervista cun il nov parsura sin pagina 7)

Cumià dal president Stefan Engler

Cun in lung applaus ed ina standing ovation ha la radunanza engrazià al parsura partent Stefan Engler per sia gronda lavur prestada durant 8 onns al timun da la partida e per ses engaschi politic profilà sin ils differentes stgalims.

Tenor il laudatur, cusseglier governativ *Mario Cavigelli*, èsi er d'engraziar a la direcziun premurusa e suverana da Stefan Engler ch'igl è reussì a la PCD da reacquistar in segund mandat en la Regenza e da mantegnair sia represchen-



Stefan Engler ha timunà la davosa giada la delegada da la PCD.

FOTO OLIVIA AEBLI-ITEM

tanza en il Parlament federal ed en il Cussegl grond. Il parsura partent haja dà tempra e profil a la partida sco partida en il mez politic e fatg fitta ella per l'avegnir. Er a la vicepresidente partenta Silvia Casutt-Derungs vegn engrazià per la lavur prestada.

Strategia da la PCD Svizra

Il parsura Stefan Engler ha orientà curt davart la strategia da la PCD Svizra che vegnia a prender a la delegada da questa fin d'emna in'emprima decisiun da principi davart num, cuntegns e logo per furmar in ferm mez politic sin plaun naziun-

nal. En quest connex vegn era tematisada ina fusiun cun la PBD. En il decurs da quest atun vegnian las partida chantunals ad organisar dietas per discussiunar intensivamain la fatschenta ed alura a decider en chaussa. La finala vegnia mintga singul commember ad avair la pussaivladad da decider davart la strategia futura da la PCD Svizra en ina votaziun plenara en scrit. Or dal mez da la radunanza vegn bain sustegnì la finamira da rinforzar il mez politic sin plaun naziunal, dentant vegn avertì da na betg renunziar a las valitas tradiziunals ed al C en il num la partida. Nums sco «mez politic» e «libertad e solidaritad» che circuleschian actualmain na persvadian en mintga cas betg. Ina fusiun cun la PBD haja plitost da prioritad secundara, uschia è stà il tenor.

Las parolas èn nundispitavlas

Cun 69:1 vuschs recumonda la radunanza da refusar l'iniziativa da limitar l'immigraziun, cun 67:3 vuschs sustegna ella l'acquist d'aviuns da cumbat e cun 70:0 vuschs la lescha da chatscha. Cun 10:4 vuschs sustegna la suprananza da partida plinavant la reducziun fiscala per custs d'assistenza d'uffants ordaifer la famiglia e cun 14:0 vuschs il congedi da paternitad.